

Gairm

Tha 'm feasgar a' fàs rapach, 's tha neimh is fuachd gu leòir as a' ghaoith fhathast, ach tha mi 'n dòchas gur ann dol am feabhas a bhios i tuillidh, 's gun do dh' fhalbh an dubh-dhùldachd buileach.

Tha 'n fhiasag agam air dol am fiadh, 's cha n-uilear dhomh taghadh na h-ealtainn mum fàg mi mi fhéin cho fìor-lom as a' bhus 's as fheudar dhomh bhith, ma thig orm a bhith 'n cuideachd urracha móra na dùthcha aig Caibeal Bhaghasdal am màireach. Nach mi leig cead ruith leis a' pheannt'. Tha ghlagaireachd fuaighte rium co-dhiubh, a Beurla 's a Gàidhlig, ach tha mi air dol bhuaithe buileach, an am teannadh ris a' sgròbaireachd-sa chur sìos a Gàidhlig.

Chuir mi air falbh dà litir—té dhiubh do Raonailt bhig a bh' agam fhéin bho chionn fhada 's i 'n diugh ann an Ceann Loch Iall 'ga cosnadh. An litir eile chuir mi dh' Ionarnis agus sia tasdan diag agus trì sgillinnean 'na cois. Chuir mi dh' iarraidh an Leabhar Sgialachd a chuireadh a mach le Mac an Iarl' Ilich² anns an litir chiadna. Chuir mi pàipeir a fhuair ann am botul air an tràigh a dh' ionnsaigh Fear-gnothaich nan Staidean ann an Glaschu.

Fhuair mi 'ghruag a thoirt dhiom aig Eóghann còir 's bha mi 'n làn-am a toirt dhiom. Is cianail fhéin mar a dh' fhàsas i agam ann an ùine aithghearr.

'N Treas Latha dha'n Mhàrt (Diardaoin).

Cha robh latha idir dona. Cha robh a bheag a ghaoith ann. Beagan a bh' ann, bha e cho gearrte ri gaoith a bh' ann ach ainneamh. Rinn i beagan reothaidh a raoir.

Ràinig mi Poll a' Charra eadar 10 is aon uair diag. Fhuair mi litir o'n Easbuig agus seachd puinnd Shasunnach 'na broinn a chuireadh a mach leis a' Chuideachd a tha 'n ainm a bhith cumail air dòigh a h-uile gnothach airgid a bhuineas do'n Sgir Easbuig-sa. Tha mi 'n dùil gur e deich a chuireadh a mach dhomh aig a' choinneamh a bh' ann mu dheireadh. 'S e sin am brath a leig an Rùn-chléireach hugam ged nach d' fhuair mi ach £7. 'S fheudar dhomh brath a chur 'ga ionnsaigh a dh' fhiach co dhiubh 'n e e fhéin no 'n t-Easbuig a chaidh iomrall.

Fhuair mi litir o Mhac 'Ille Mhìcheil ann an Dun-Eideann 's tha e coltach nach urrainn da fhéin 's no dha'n Ollamh MacEanruig sealltainn a mach an taobh-sa an dràsda. B' e sin an call dhomhsa nach d' fhuair mi greis dha'n seanchas.

Fhuair mi litir thiaruinnte o Chailleach bheag nam Bòcan³ agus litir eile. Chuir i air adhart dealbh Mhr. Seòrus a Dhalabrog⁴ air chùram Mhr. Somhairle (ach tha i daonnan a' dianamh "Dughallach" 's dh' fhaodadh e bhith gun deach an dealbh a Bheinne-bhaoghal ri linn sin). Tha i air dol gu àite còmhnaidh eile ris an can iad Bushey Heath. Chaidh eachdraidh Mhr. Seòrus a losgadh oirre le lamp a spreadh air a' bhòrd 's a theab an taigh a chur 'na theine air an diòl-

² Iain F. Caimbeul, Ile. (Iain Og Ile).

³ Miss Goodrich Freer. Is i sgrìobh an leabhar "The Outer Isles" agus bu mhór an cuideachadh a fhuair i bho Mhgr. Ailean. Is gann gun d' rachadh aice air an leabhar a chur r'a chéile idir gun e fhéin a bhith 'ga cuideachadh.

⁴ Mgr. Seòras Rigg, sagart Dhalabrog, a chailleadh le bhith frithealadh luchd an fhiabhruis mhóir anns a' bhliadhna 1897. Rinn Mgr. Ailean marbhrann dha.